



Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница

Пренумерата в краю:

30 грошей місячно,
80 „ квартално,
1.50 „ полрочно,
3 зл. рочно.

В Америкі: 1 дол. рочно.

В Чехословакии:
2 кор. місячно, 10 кор. полрочно,
20 кор. рочно.

Ціны оголошень:

Ціла сторона 120 зл., $\frac{1}{2}$ сторони 60 зл., $\frac{1}{4}$ сторони 35 зл., $\frac{1}{8}$ стор. 20 зл., $\frac{1}{16}$ стор. 10 зл.; оголошення малы за 1 мм. 20 гр., в тексті 30 гр., перед текстом 40 гр. При місячном и долгом оголошеню значна знижка.

Контото чекове Нр. 404.155.

Поможме учачой ся молодежи.

Роспочал ся школьный рок. Ходят знов до школы веселы школяры. Радуют ся, же могут користати с науки и просвічати свои умы. Тішат ся нима и их родичи и хоц тяжко приходит ся им оплачати за удержане дітей, пхают их дальше в той милой надежді, же вплачены гроши не пропадут, а выйдут на користь дітины, народа и краю.

В удержаню хлопских дітей с западной Лемковщины помагат сильно Руска Бурса в Горлицях. В ней містит ся в том році 38 школяриков народных и середных школ. Приняты они сут за низку ціну, котра нияк не вы-

старчат на покрьте выдатков, звязаных с удержанем бурсаков. Прото тыж, як каждого року, так и тепер мусиме всі поспішити с помочом бурсі а тым самым и находячим ся в бурсі ученикам. Со складками не зволикайме, але зараз по зерняных роботах приступиме до збераня по селах землеплодов. Нехай даст каждый, што може, кто гроши, кто бандурки, капусту або зерно, а инший дырва на опал. Если приступят до складок всі села, збере ся того достаточно на выкормлене и огрїте комнат для наших молодых потіх.

Крытычный тиждень Чехословакии.

Справа судетских німцов ест все ище не рішена и беспокоит умы европейских политыков.

Англия и Франция хотіли бы полагодити тоту справу в дорозі международной конференции, в Німеччині говорит ся о народном голосованю (плебисциті) в Судетах, а сами чехы приготавливают ся до войны, штобы в разі нападу со стороны Німеччины могли боронити ся.

Всі уважают теперешне положене за барз поважне и хотіли бы допровадити як найскорше до угоды. Однак Гитлер не уступат и

политыкы німечкы старают ся вмовити так в німечке населене, як и в другы державы, же не Німеччина, а Чехословакия и Франция являют ся напастниками. До вытвореня такого мнїня може причинити ся повстане судетских німцов и с таким фактом зачинают ся числїти европейскы державы.

Англицкы газеты привязуют до того факту так велику увагу, же высказуют мнїне, же от того, чи Німеччина потрафит вмовити в другы державы, же Чехословакия ест напастником — зависит судьба мира або войны.

Сталин раненый в катастрофі.

Сталин выїздат каждой суботы до своей виллі, положеной в Горках. Таксамо зробил он и в суботу, дня 27. серпня. Выїхал с Москвы автомобилем и ескортвало его пару инших авт с агентами Г. П. У.

На дорозі шофер Сталина, комуніст-німец Шульц розвинул велику скорость и автомобиль в полном розгоні ударил о дерево.

Самоход Сталина ест незвычайно сильный и тому обстоятельству завдячают всі, котры находили ся в автомобилі, же вышли с катастрофы живы. Сталин однак мал зломити руку, а два офицеры Г. П. У. сут легко ранены. Самоход погаратал ся. Шофера арештовано, бо заходит подозрїне, же випадок был упрянований. Сталин лежит в своей виллі в

Горках, где завозвано найславнейших советских хирургов.

Початково рососли ся вїсти о бомбовом замаху на Сталина, оказали ся они однак неправдивы.

Правдом натомїст ест факт, же Сталин того року не выїхал в літі до своей літної резиденции на Кавказі недалеко Сочи. В резиденции той Сталин каждого року проводил літны місяцы. Ведля кружачих поголосок, было уж всьо приготовлене до выїзду Сталина. В последном моменті управитель Кавказу Беря остерег Сталина, просячи его, штобы не выїзжал на Кавказ.

Беря повїдомил Сталина, же горска провинция Кавказу, т. зв. республика абхазка, по-

присягла помстити ся на Сталині за того, же в прошлом році розстріляно ціле правительство той республики разом с премером Нестором Лекобом. Лекоба походил с черкесов, у котрых задержало ся до тепер право „родовой помсты“, а понеже члены родины розстріляного премера живут в недоступных горах, прото до тепер не удало ся агентам Г. П. У. унешкодливити их жителей.

Сталин по одержаню тых вїстей постановил не выїзджати в том році на Кавказ и очистити терен с опасных элементов.

Сектанство на Полісію.

До найбїднейших и найтемнейших наших земель належит безпорно Полісіе. Люде живут там на мало урожайных болотах и сут большу часть року отрізаны от світа. С той темноты користають рижны агитаторы сект, котрых на Полісію натворило ся премного. Сут там штундо - бабтысты, котрых ест около 6 тысяч, адвентысты о меньшом числі членов, суботники, бадачи св. Писма и инши. По штундо-бабтыстах найчисленнейша ест секта зеленосвятников, котра числит 4.850 членов. Ест там также секта Илианцов, основана через монаха Илию и найцікавша со всіх секта Мурашковцов, котру основал звычайных хлоп Мурашко, подаючий себе за пророка. „Пророк“ тот не зле выходит на „пророцтві“, бо купил собі 200 гектаров землі в сарнецком повіті и хоче там будовати „новый Єрусалим“.

Серед тых сект розвиват ся также безбожництво, котры користають с такого розединеня людей. Безбожники маот свои осередкы по містах и на села высылают своих агитаторов, котры платят по 5 злотых каждому, кто приступит до безбожничой организации.

И на жаль находят ся такы, котры за 5 зл. продают святу віру своих предков.

В Німеччині запроваджено 10 годинный час работы. Введено 10-годинного часу дневной работы в Німеччині настроило швейцарских работников неприхильно до гитлеровского порядку. Продолжене часу работы введено в звязи с ускореным темпом вооружень и браку работников. Пробы заступленя работников женщинами не дали добрых результатов.

Нова „чистка“ в совітской армії.

Англицькі газети подають, же в червеной армії переводит ся дальшу чистку.

Ведля тых інформацій перешло 100 высших офицеров, починаючи от начальников бригад в гору, ест усуненых с сухопутной армії. Становит тото 80 процент высшого военного начальства.

Подобно мае діяти ся в морских военных силах, где с начальных офицеров усунено 50 процент, то ест половину.

За послідне пол року в ленинградском окрузі усунено 60 процент партийных урядников. В том самом часі „чистка“ обняла на Україні перешло 50 процент партийных урядников, а в Москві — 35 процент.

Биланс тот был бы не полный, если бы не додати до того, же от січня т. р. жертвами „чистки“ пало 146 народных комисарей правительства центрального и поодынокых совітских республик.

Чистка не оминула аж и „червенох potentатов“. Московский корреспондент французской газеты „Ле Журналь“ доносит, же недавно розстріляно Жаковского, заступника Ежова.

Жаковский был великом фигуром на Кре-

мли. Он тішил ся довірем Сталина и Молотова и был заступником Ежова. Налезал до людей, котры безпощадно гнобили и переслідовали „троцкистов“ и всіх „шкодников“ Совітов. За подвиги в гнобленю „врагов народа“ достал ордер Ленина, найвысше отличие в Совітах. Але в коротком часі его приятель Ежов оскаржил его о шпйонство и Жаковского вывезли на Лубянку, а перед пару днями розстріляли.

Найострішу чистку переводит ся в промыслі летничом. От пару місяцов сидит в тюрьмі проф. Тупалев, оден с найталантливших конструкторов. Судьбу его поділили также тоты, котры с ним разом трудили ся. Лем гдеякы остали ся ище при роботі, але и тоты, идучи рано до роботы, не сут певны, чи вечером с ней повернут.

Тото само діе ся в иншом промыслі. Чистка обняла всіх и тепер Совіты звертают ся знова о помоч до заграничных „спецов“.

Прото тыж, як доносит корреспондент французской газеты, серед совітского населения ест недоволене. Стары „большевикы“ удають, же находят всьо в порядку, але молоды зачинают ся бунтовати.

Берлин и украинцы.

Газеты німецькы безперерывно пропагують мысль экспансии німецькой ку всходу, котра ест одыноком будучностью Европы с тым моментом, коли заморскы краи заперли свои границы кля европейской границы.

Газета „дер Дейтше им Остен“ пише, же Европа потрафит ся удержати лем втотчас, коли стане ся самовыстарчальна и коли здобуде новы терены емиграційны (на Сибіри) и новы рынky господарчи (Росія). Границом Европы мае быти в полном змыслі слова Ураль.

Зрозуміла річ, же Німеччина валит на себе цілый тягар переведеня той акции и она перша мае перти ку всходу. Як она зробит с Польщом, о том німецькы газеты не пишут, але за тото пише ся в газеті „Геополітик“ в статі „украинцы и полякы“, же Украина ест самовыстарчальна господарчо и населене ей не терпит так поляков, як и большевиков.

Дальше автор статі подає, же украинска культура завдячат барз дуже романтиці німецькой, котра додавала отухы украинцам в их борбі за свои права. Украина, пише дальше

автор, то край невычерпанных природных богатств, а „украинский народ“ ест забавком в руках мужей світовой политькы.

С цілою статі виходит, же Німеччина барз радо заопеквала бы ся так тума богатствами Украины, як и „украинским народом“, жебы перестал быти „забавком“, а притом и прото, штобы сама могла стати ся самовыстарчальна.

Совіты задержали румунский корабель. Совітскы власти задержали румунский торговельный корабель, котрый отплынул с порту Галач ку Тульцеи.

В часі переїзда через Дністр—Лиман совітскы власти перевели контролю на кораблі и ствердили, же на кораблі находит ся совітский гражданин Гавриил Остапенко, котрый збіжал недавно с Совітов.

Совітскы власти недоволили ся арештованем Остапенка, але задержали также пароход румунский, перевозячи его до пристани Овидиополь.

Посылайме діти до ремесла.

По наших селах ест барз мало фаховых ремесельников. Сут самоукуы теслі, столяры, ковалі и т. д. але лем рідко трафит ся вышколенный ремесельник. А преця ремесло дає добрый кусник хліба и ремесельник уцтивый и знающій добре свое ремесло же ище ліпше от газды, хоц не наробит ся так тяжко як газда.

В послідных часах слышит ся, же ту и там отдал ктоси своего сына на термин до краветства, шевства, столярства, ковальства, або слесарства, але до инших ремесел не отдають наши люде своих дітей. А преця ремесло обнимат всі выробы, яких потребують люде. Ест отже ремесло ювильерске, бронзовниче, самоходово - слесарске, монтерске, выробу опычных знарядов (окуляры и т. д.) сідлярске, рымарске, капелюшниче, друкарске, каменярске, різбарске, котлярске, мосяжниче, бляхарске и т. д., котрого не лем не учат ся наши діти, але о котром мало кто знає, якы возможности и доходы може дати доброму ремесельникови неоднo с тых ремесел.

Говорит ся много о том, же мы бідны, же у нас ніт фабрык ани ниякого промысла, а діти держиме дома и не даеме им науки. Треба памятати о одном и николи о том не зыбывати: Промысл и фабрыкы творят ся с часом с ремесельничих варстатов.

Где ніт добре вышколенных ремесельников где ніт ремесельничих варстатов, там ніт фундаменту под великий промысл и фабрыкы.

Материялу в людях ест для ремесла досыть. По наших селах не бракує добрых майстров - самоуков. Килькож то разы встрічат ся по церквах прокрасны різбы, зроблены доморослым артыстом - самоуком. Сут по селах и конструкторы рижных машин рольничих (млынков и инших) зробленых прецызійно. Если бы всіх тых, котры мають талант до майстеркы, отдати на науку в отвітном напрямі, в недалгом часі в наших селах зароилю бы ся от добрых фаховых ремесельников. Втотчас наши гроши не переходили бы до чужих рук, а ремесельники своими фаховыма знаннями причинили бы ся до экономичного поднесеня села.

Летнича катастрофа в Венгрии. Над Дебречином в Венгрии упал на землю с незнанных причин комуникаційный самолет и спалил ся на місци разом с подорожныма. В катастрофі згынуло 9 журналистов венгерских.

М. А. Т.

Мои воспоминаны с 1914 р.

(Продолжене).

Дня 19. вересня 1914. около год. 8 вечером транспорт наш задержал ся на маленькой станции Абтиссендорф коло Грацу и нам приказали высідати. На площі стояли воякы не воякы с карабинами и походнями. Были то рослы хлопы, одіты переважно в цивильну одеж с перепасками на рукавах и с карабинами без ремней, котры тримали в руках. Тоты люде мали нас дальше ескортovati. Уставлено нас в ряды по чотырох, перечислено и приказано ити вперед. Шли мы в темноті, не розбераючи ся цілковито в окрестности чистым полем може годину, потом оставлено нас в поли и показано нам „німецьку культуру“. Конвоенты переходили помеже ряды змученых до послідных границ людей и под предлогом, же ктоси стоит неровно, — же не вытягнул ся належито в струну — почали бити нас кольбами в немилосердный способ. Д-ру Александру Циханскому из Крыницы перебили щеку и зломали 2 ребра, пок. Михаилу Дзюбинскому поломали ребра, Осифу Енкалі шпыком перебили колнірик и ранили его в шию, Ивана Андрейку и пок. Теодора Гнатышака збили кольбами по ногам и грудях. То сут жертвы с найблизшого моего окруженя, а били всіх, отже можна собі вообразити легко, килько людей там скатовано. Здівано ся так над нами

добрю годину. Потом розділено нас по цельтах, перезначаючи на 1 цельт (о вымірах 5 м. × 5 м.) по 30 людей рижного віку и пола.

Короткий приказ: „нидер!“ (клад ся!) и мы всі легли, збиваючи ся в велику купу на середині цельта, бо вартовники, ходячи коло цельтов, дбали о тото, штобы нигде не выпхати стін и як лем спостерегли, же в гдеяком місци стіна ест напружена, били сейчас в тото місце кольбами.

Змучене было однак так сильне, же мы помимо того, што лежали одны на другых, скоро заснули. Лем в ночи от часу до часу чути было стоны людей, котрым потерпли руки и ноги.

В нашем цельті кромі цілої сандецкой группы нашол ся Марущак, студент Сушкевич с двома сестрами, теперешный инспектор школьный в Тарнові Стеранка, ветеринар Макс. Крыгич со своим сестром, ветеринар Охнич с женом и начальник суда в Вадовицах Райхель с женом.

Цікава была история нач. суда Райхля. Он яко поляк, жиющій в Вадовицах, находил ся поза всяким политычным подозрінем, але на свое несчастье жил в незгоді с вадовыцкым старостом. Коли отже староста зарядил, же Охнич, Крыгичи и Стеранка, яко руснакы, мусят быти вывезены, Райхель, котрый был швагром Крыгича, зголосил в Старостві свой выїзд и просил о потребны легитымации для себе и родины. Староста охотно служил радом и дорадил Райхлеви, што шкода платити билет, бо он може поїхати разом с Крыгичами и Охничами и в Грацу (бо там хотіл выїхати Райхель) отділити ся от них и замешкати пры-

Покладанє стерней.

У нас практикує ся так, же на стернях пасе ся худобу. Через таке поступанє має селянин втрату, бо худоба допче землю на стернях, збиват ю в одностайну масу и псує структуру (будову) почвы.

Земля, то не єст якаси мертва маса, але сильно скомплікований, жиючий организм, в котром происходят перемины, от котрых зависит уражайность. В землі живут миллионы и миллиарды малых существ, т. зв. бактерий, котры через свою цікаву діяльність дають жите рослинам. Штобы бактерии могли добре розвивати свою діяльність, мусят они мати добры условия в землі и земля мусит мати добру будову, а также мусит в ней быти под достатком воды. Тоты условия мусит виробити в землі сам господар через выконанє отвітной работы на полях.

Важном роботом для удержаня доброй будовы землі и задержаня в землі воды єст покладанє орного поля зараз по собраню с него землеплодов. Покладати повинно ся як найскорше, хоц бы стояли ище на стерні копцы з зерном. Покладати треба як найплытше и брати широки скибы, штобы укладали ся добре, одна на другу. Лем грунт, где єст много пырию, ореме кус глубше, ставляючи скибы на шторц, штобы пырий высох скоро. Высхнений пырий усуваме боронами с поля.

Неоден господар звідат ся, по што так скоро орати стерню? Преця через оране она высыхат и розрастат ся на ней бурян. На таке пытанє мусит ся отповісти, же именно ходит о того, штобы насіне буряну склчило тепер, штобы можна было его вынищити, бо в противном разі бурян розросне ся в зерні на другий рок. Если ходит о высыханє грунту, то справа має цілковито инакше, як то думают многы господары, а як ся має постараме ся зараз выяснити.

Каждый с нас спостерег нераз, же як вложиме конец бибулы до воды, то по якомси часі, ціла бибула буде мокра, хоц лем оден ей конец єст замоченый в воді.

Выстарчит однак в одном місци передерти бибулу и уж вода не подходит по бибулі выже передертого місца. Таксамо не подходит вода густом папері до писаня. Чом же то так єст? Бибула єст збита легко и в ней єст ціла маса маленьких рурок, по котрых вода подходит до горы. Если бибулу передреме, то перерываме рурочки и вода выже не подходит. Папер єст сильно збитый и нїт в нем рурочок, прото тыж вода не подходит по папері.

Таксамо має ся справа с водой, находячом ся в землі. Земля складат ся с маленьких грудок, котры не сут збиты в одну масу, лем творят меже собом рурочки, по котрых вода подходит до горы. По переораню землі мы перерываме тоты рурочки и вода не подходит под сам верх, а остає в нижных верствах. Сонце высушат лем верхну, переорану верству, але в глубшой верстві землі остає вода. Можна тото справдити на спокладаном поли, отгребуючи скибу, под котром найдемє все мокраву землю. Если бы мы однак оставили поклад, то скибы уляжут ся и рурочки получат ся на ново. Прото тыж треба по якомси часі поборонити поклад, штобы боронами поперерывати рурочки.

Таким способом обезпечимє поле от пересхненя, а каждый знає, яку велику вартость в грунті має вода. Вода удержує землю в грудках и тото называмє добром структуром (будовом) землі. Вода допроваджат также до землі повітре, котрого потребуют бактерии и роспуцат в землі рижны навозы, потребны для належитого розросту рослин.

Через спокладанє нищимє также бурян на полях. В часі розросту и приставаня зерна пристають также рижны буряны, котры сами ся розсївають. Если стерень плытко переореме, то насіне буряну, маючи воду пукат и скоро вырастат. В тотчас можна бурян найлегче вынищити боронами. Если поля не покладем, то насіне буряну в осени лежит на сухой землі и пукат аж на весну. В тотчас росне разом с засївами и занечицат зерно. Покладати поле треба не лем под окоповы и яры зерна, але также под озимины, котры сут за тото барз вдячны.

Як с того видимє, покладанє поля єст одним с найважнїших работ полевых, о котрых не може забыти господар, если хоче мати хоцен со своего грунту. В коротком собраню, покладанє поля дає слїдуючи користи: 1) хоронит поле от высыхненя, 2) нищит бурян, 3) причинят ся до перегнїтя в землі стернянки, чим обогацат землю в порошокнячку и 4) удержує землю в доброй структурі.

Як охоронити зерно перед заразом.

Штобы охоронити зерно перед заразом, практиковано у нас, же насіне змывано водой, в котрой роспуцано т. зв. „синий камень“. Заправа зерна синим камнем называт ся мокром запровам и єст непрактична, бо за-

ватно. За таку добру раду Райхель подяковал сердечно старості и цілу дорогу хвалил его чесноту. Аж в Грацу переконал ся, же австрийский староста инакше думат, инакше говорит и инакше робит, бо коли ту хотїл он высїсти с вагона, конвоєнты на тото не позволили, заявляючи, што мають приказ доставити его, яко политычно опасного до Талергоф. Таким способом нашол ся он также меже нами в Талергоф.

На слїдуючий день пришло ся нам дальше и грунтовнїше познавати „німецку культуру“. У нас сут до грабаня уживаны граблі. Але так видно єст лем у дикых народов, бо в Талергоф доказано нам, же тот рольничий знаряд єст цілковито непотребный. Попередного дня, приготавлиючи для нас помїщенє в цельтах, росшмарєно по цельтах покос соломы. Соломы той натрясло ся и меже цельтами, треба ю было отже погратити. Рано достали мы приказ очистити поле с соломы и без грабель зробили мы тото так добре, же ани одно стебло не остало. Правда, многы поздерали собі при той роботі скору с концев пальцов (бо приказано гратити пальцами), але никто не нарікал и всі мы зразу почувствовали, што мы стали культурнїши. Там зрештом всьо робило ся культурно и на каждом кроку видно было западну цивилизацию. Раз нпр. оголошено в таборі завозване, штобы всі пані, котры говорят по німецкы, французскы и англицкы зголосили ся в канцелярии. Нашло ся пару високо образованых женщин и им приказано прати лахы для варты. У нас потрафит тото зробити каждая дївка со села, хоц бы она

не умїла читати и писати, а там — „в цивилизованом краю“ — потребне до того знакомство чужих языков. От культура — от цивилизация!

Найстрашнїше однак с помеже всього было зарядженє, относяче ся до полагодженя природных потреб. Не было там нияких отдільных убикаций, а природны потребности заспокоивало ся в долгой ямі, коло котрой на палях был прибитый дручок. До того дручка выпроваджали вартовники разом женщин и мужчин и не помогли мольбы ани просьбы, штобы ишли отдільно мужчины и отдільно женщины. „Німецка культура“ не признає таких бздур, она взнесла ся так высоко, што вызула людей со всякого встыду. Мы, люде низшой культуры, не могли зразу подняти ся на вымаганий уровень и через тото многы страшно ся розхворїли.

С ідлом было в Талергоф початково барз планно. Давали мало и нерегулярно, а притом многы люде не могли цілком користати с кухні, бо не мали до чого взяти ідла. Посуду (шалыкы) роздано нам по пару днях, а передом кто мал гдеяке горнятко, або мисочку, тот брал ідло, а кто не мал, обходил ся о своем. Переважна часть жила отже лем хлібом, котрый выдавано нам каждого дня рано. Остаючи на чорном хлібі, без теплой стравы, люде почали западати на жолудок и в коротком часі появила ся червонка, котра страшно нищила силы людей.

Продолженє в слїд. числі.

От Руской Бурсы в Горлицах.

Родичи, котры внесли поданє о принятє их сынов до бурсы, достали уж повїдомленя о полагодженю просьб. На жаль кильком Выдїл был змушений отказати в принятю по причині браку місца. Принято 38 учеников.

Всім воспытанникам подвисшено оплаты (незначно впрочем), бо инакше не можна было бы звязати концы с концами. Однак и так фонды бурсы были бы за малы и тому, як каждого року, Выдїл зверне ся до широкой руской общественности с просьбою о помїч в продуктах и грошах. Крїпко вірим, що голос наш трафит до сердец людей доброй волї...

При вступі заплачат всі родичи оплату за перший місяц и одноразову оплату за инвентар в высоті 8 зол., а также членску вкладку.

Родичи учеников школы народной мають также заплатити сейчас таксу школьну в высоті 15 зол. (за цілый рок).

Заряд бурсы.



Дня 24. серпня т. р. умерла в Дахнові коло Любачева Елеонора Черкавска, рожд. Константынович, вдова по бл. п. Юанні Черкавском гимн. професорі, котрый был одним с членов основателей Руской Бурсы им. Мейского в Новом Санчі.

Похороны состояли ся дня 26. VIII. 1938 в Дахнові. В помершей отойшла с того світа женщина рїдких качеств и твердых русских убїждений.

Вїчная ей память!

правленє зерно треба зараз высїяти, бо инакше може оно попукати и попусити ся.

Прото тыж в послїднїх роках уживат ся заправы сухой. В той ціли купує ся в аптечных складах т. зв. „зерняк Ц“ (Зярник Ц“), котрый мішат ся на сухо с зерном.

На 100 кг. жита або пшеницы бере ся 20 дека „Зерняку Ц“ и всыпує ся разом с зерном до сухой бочки, котру качат ся так долго, аж каждая зеренце покрये ся порошком заправы.

„Зезняк Ц“ хоронит зерно перед заразом, бо окружаєт каждая зеренце охоронном верством, котра дійствує аж в землі, убиваючи зародкы заразы, яка находила ся на зерні в часі заправы, причом не шкодит цілковито насїню.

Што чути в світі и в краю

Чудесный поворот до здоровля. В одной місцевости коло Генуи в Италии, в часі отпусту, в присутности епископа Цыренаики, мал місце случай чудесного оздоровлення женщины. 60-літна женщина, котра от 4-ох літ не могла рушити ногом, нагло по благословеню встала и почала цілковито свободно ходити. Случай тот выкликал серед присутных велике счудоване.

Сын президента Амерыкы — купцом. Наймолодший сын президента Амерыкы, Рузвельта, постановил остати купцом. Незадолго мае он зачати робити в одном великом склепі нійше людей усунено с партии и с уряду, а в Бостоні с платньом по 18 доляров тыжнево.

Миллионер с долгами. В Амерыці умер знаный миллионер Инзуль, котрый перед пару роками мусил втечи с Амерыкы за рижны мальверсаци и жил в Греции. По смерти выявило ся, же Инзуль мал всего 1.000 доляров готовых грошей, а на его маетку тяжит 14 миллионов доляров долгу.

Ширит ся слинавка. Слинавка ширит ся по наших селах незвичайно скоро. В п. новосандецком ніт праві одного села, где бы не заглянула тот страшна зараза. Люде скорбят, бо мусят держати худобу в стайні, што може спричинити брак паши под конец зимы.

Видень под прускым гербом. Заряд міста Відня ухвалил усунути дотеперешный знак міста, представляющий червений крест на бідом поли и на его місце приняти герб с прускым орлом.

Человік, котрый не отдыхат. Увагу лікарских кругов звернул на себе оден вояк в Дании, Ян Фридрихзон, котрый отличат ся огромном вытревалостью своих легких.

Вояк тот потрафит вытримати без отдыха под водом 4 и 1/2 минуты. Ище долше, бо 5 минут и 17 секунд потрафит он вздержати отдых на суши. Лікары заинтересовали ся живо феноменальным тыпом, котрый через 5 минут потрафит обыйти ся без отдыху.

Поїзд гнал сам без машинисты. Незвичайный случай мал місце с поїздом, идущим с Пенсильвании до Сан Люис.

В паровозі высадило котел и сила експльозии была так велька, же вышмарила с паровоза машинисту и паляча, котрых найдено убитых коло желізничого тору.

Поїзд, належачий до найскорших в Амерыці, гнал однак дальше силом розгону и задержано его аж о 3 милі дальше. На счастье желізничий тор был свободный и не было на нем острых закрутов, в виду чого никому с подорожных не притрафило ся несчастье.

Вкрали плот именем міста. Теперешным злодіям не бракуе нераз цікавых помыслов. Недавно до одной фирмы в Быдгощи явило ся с возом пару людей, котры показали сфальшоване заряджене магистрату, приказуюче рособрати плот, яким была огорожена фирма. Злодіи рособрали плот долгий на 300 метров, поскладали дощкы на возы, дали поквитоване и отіхали. По пару днях фирма довідала ся, же пала жертвом спрытных злодіев.

Третий раз квитне грушка. В Познаню в огороді Матясяка находит ся рідкый оказ грушки, котра того року квитне уж третий раз. На грушці висят тепер великы овочи с першого квітя и малы, зелены ище овочи, яки завязали ся при другом квитненю. Середных овочей появил ся третий квіт.

На Полісю дикы. На Полісю появили ся в послідных часах численны кырдели диков, котры выряджают значны шкоды в полях.

Гроши в память 20-літя. В память 20-літя независимости Польши проектована ест емисия памятковых монет. Мають быти выбиты монеты и медалі, с написом юбилейных літ 1918—1938. Также мае появити ся серия исторических, почтовых значков, представляющих рижны моменты с истории Польши.

Хотіл окрасти костел в Кобылянці. До костела в Кобылянці в пов. горлицком закрали ся злодіи. Они отворили перши двери вытрыхом, а в других вывертели 7 дыр водруг замку, штобы его выважити. В том часі злодіев ктоси сполошил и они втекли.

Полиция зарядила энергичну акцию в ціли выкрытия злодіев.

Пожар в Новиці. В Новиці пов. горлицкого в хаті Осифа Ференца повстал огонь, котрый знишил цілый верх хаты. Шкода выносит около 1.500 зл. Причином огня была правдоподобно хыблива будова комина.

Вдарили в себе два самолеты. Во Франции в часі ночных вправ войсковых вдарили в себе два войсковы самолеты и спалили ся разом с обслугом в числі 6 людей.

Катастрофальна злива в Мексыку. В Монтерей и окресности в Мексыку ліют от дол-

шого часу дожджи, котры спричинили зяляне водом великих пространств земли. Вода забрала 800 хат и 900 родин остало без даху над головою.

Komornik Sądu Grodzkiego w Muszynie

Sygnatura: Km 744/38.

OBWIESZCZENIE O LICYTACJI RUCHOMOŚCI.

Komornik Sądu Grodzkiego w Muszynie Leon Józef Faleński, mający kancelarię w Muszynie, ul. Piłsudskiego, na podstawie art. 602 k. p. c. podaje do publicznej wiadomości, że dnia 20 września 1938 r. o godz. 8.30 w Krynicy, u zobowiązanego, odbędzie się 1-sza licytacja ruchomości, należących do Mgra E. Sygalla w Krynicy, składających się z wagi stołowej, 1 kasy National, 30 fl. wody kolońskiej 1/4 l, 1 wagi aptekarskiej, 35 słoży apt.

Ocenienie przed licytacją.

Ruchomości można oglądać w dniu licytacji w miejscu i czasie wyżej oznaczonym.

dnia 13 sierpnia 1938 r.

Komornik

Комунальна Каса Ощадности Повіта Краковського в Кракові

Рок основаня 1882.

ЦЕНТРАЛЯ КРАКОВ, УЛ. ПИЯРСКА 1.

тел. 115-97, 131-73, 101-03.

О т д і л е н я : К Р Ы Н И Ц А, тел. 112.

В Е Л И Ч К А, тел. 6.

Всі порученя входячи в область банковости.

ПОРУЧЕНЯ ДЕВИЗОВЫ
ПОРУЧЕНЯ БИРЖОВЫ
СХОВОК АВТОМАТ.

СУМА ВКЛАДОВ ПОНАД 35.000.000 ЗЛ.
МАЄТОК ВЛАСНЫЙ ОКОЛО 6.000.000 ЗЛ.

БЕЗОПАСНОСТЬ.

ДОБРЫЙ ПРОЦЕНТ.

ДЕРЖАВНЕ ЗАВЕДЕНЕ КУРАЦИЙНЕ
В БЕСКИДІ ЗАПАДНОМ

К Р И Н И Ц А — З Д Р О Й

Доїзд СКОРЫМА ПОїЗДАМИ через Тарнов—Новый Санч
ВАГОНЫ СЫПЯЛЬНЫ

15 жерел щав желізисто-земельных, богатых в безводник угля. — Здрой Зубера, найсильнійша щав алькалична Европы. (Польске Виши), купелі минеральны: квасоуглевы и боровиновы. КУПЕЛІ СОНЕЧНЫ. — — Заведене заосмотрене в найновійши приряды лічничы. — — Купель газовы сухы.

Пияльня и лазенкы, огріваны в зимі центрально. — Дом здровый покои с теплом водом.

РЕСТАВРАЦИЯ — ДАНЦИНГ — ЧИТАЛЬНЯ — РАДИО

Театр в сезоні головном, кино, спорты літны и зимушны.

Крыницкы воды лічат:

хвороты сердця, жолудка, жолчи, печенкы, проводов мочовых, женочи, малокровие, нервы — дійствуют добре на перемену материи и т. д.